

Diuz daihloh gvaq giuzgungj faen sam ca, ca ndeu doeng hagdangz, ca ndeu rangh bae haw, ca ndeu yiet daengz Mbanjmbwk.

Henz giuzgungj miz aen ranzdog nenj haeux ndeu, dwg ranz Daegsoux. Daegsoux bineix seiqcib lai bi lo, gaenx hong haengj bang vunz, doiq vunzrwix saehrwix gig haemz. Daegsoux bae rog guhhong laeuqcienz cib geij bi lo, seiq ndwen gonq ngamq dauq ranzmbanj lawh boh de nenj haeux, aenvih boh de nienz geq lo.

Miz haet ndeu gouj diemj cung, Daegsoux youq naj douranz nenj haeux, sawqmwh yawjraen Hoz lauxsae gwih aen cidendung ndeu daj Mbanjmbwk okdaeuj bae hagdangz. Daegsoux gipmuengz dongx Hoz lauxsae, heuh de dingz yaep he, songde haujlai bi mbouj raennaj lo, song vunz angq dwk ganggoj yaep ndeu le, Hoz lauxsae couh naeuz: “Gou bae hagdangz lo.”



“Lauxsae byaijndei nw!” Daegsoux naeuz.

Daj ngoenz haenx hwnj, Daegsoux ca mbouj lai ngoenzngoenz haetcaeux gouj diemj cung couh yawjraen Hoz lauxsae gwih ci daj henz ranznenjhaeux bae hagdangz. Raen lai le, Daegsoux nyaenx mbouj ndaej caeuq vunz ndaw mbanj naeuz: “Gyoengq saeseng youq hagdangz haenx hwnj ndaej it ngeih dangz le, haet gouj diemj, laj byonghngoenz sam

diemj, Hoz lauxsae ngamq bae hagdangz, cuengqhag le, de doengz lwghag caez dauq. Caen dwg meuzlaux nyouh henj bw. Seizgonq, Hoz lauxsae son dou, nyengh gig gaenx, dwg boux lauxsae dangjyenz youhsiu ndeu. Banneix, gou raen de bienq lo. Lauxsae mbouj souj gijliz, lingjdauj hix mbouj guenj, nguh lwglan raeuz bw. Ndaej hoengq gou itdingh bae caeuq lingjdauj fanjyingj mbat ndeu.” Miz vunz naeuz: “Byawz miz aen bak lawz gwn aen mak lawz, lau mwngz guenj mbouj ndaej bw.” “Mbouj ndaej, mbouj ndaej hix aeu guenj!”

Miz ngoenz ndeu, Daegsoux bae haw cawx doxgaiq. De daj gyae yawjraen yaucangj caeuq Hoz lauxsae nem laeq lwghag ndeu youq laj dingzhaw gwn haeux. Daegsoux laeglemx byaij gvaqbae baex youq gasaeu henz dingz guhcaeg dingq

yawj. Yaep he, de raen Hoz lauxsae yaek cienz okdaeuj, naeuz: “Dahsau, sou cienz, aeu geijlai?”

“Gungh 80 maenz.” Dahsau naeuz.

Yaucangj sikhaek ndwn hwnj-daeuj: “Gou gyau cienz, gaej aeu cienz Hoz lauxsae.” Songde nyoengx bae nyoengx dauq, dahsau lijdwg sou cienz Hoz lauxsae. Daegsoux raen yienhneix, nyaeuq da sim siengj, yenzlaiz Hoz lauxsae gig rox bungjbauq lingjdauj, gvaiq mbouj ndaej de baenzneix swyouz. O, gou ngeix hwnjdaeuj lo, miz lwghag naeuz, Hoz lauxsae cawx miz aen geifonghaiz ndeu, cuengq youq hagdangz, baez ndaej hoengq de couh bang lwghag fong haiz fong daehsaw. Caen dwg itmienh son saw itmienh guh seng’eiq laeuqcienz. Dingz lauxsae neix mbouj noix bw. Lwghag gangj, gou mbouj saenq. Ngoenzlwenz gou bang vunzwnq doz raemz baema ginggvaq hagdangz, daj rog yawj ndaw bae, caen raen Hoz lauxsae youq hag dangz fong haiz dahraix. Hai, caendwg liengzsim mbouj cuk ngwz ndwnj ciengh bw. Roeg dam gwn vaih ai, vunz dam caiz vaih mingh. Lauxsae ha, siujsim di bw. Lauxsae ngoenzngoenz daengzceiz, nguh lwglan mbanj raeuz lai lo, ngoenzcog gou aeu dingz hong bae hagdangz yaep he. (caengz sat)

Song Hoih Hai Ndaej Ndei

两会开得好

□Suh Dasingh / 苏大星

Yinzda caeuq cwnghiez
Song de cib ngeih gai
Baez daihngaih hoih hai
Baekging lai nauhyied

Minzswnggh aeu gaij ndei
Sevei hamj baenaj
Byaij roen buet lumj max
Lajmbwn yawj guek raeuz

Cungilij guh baugau
Neiyungz sau youh naek
Daujlun aeu haeujaeg
Rap naek dawz gwnzmbaq

Gyauyuz aeu roengz bonj
Gyonj gung vunz miz caiz
Gensez yungh vunz lai
Guekgya vaiq fazcanj

Bi’ gvaq cingczik hung
Swnghecanj cungjeiz maj
Ndaej daengz caet diemj haj
Lumj va hai sam nyied

Yw bingh aeu gaijgwz
Yinzminz dwz(ndaej) saedsaeh
Vunz lai ndaw sim geiq
Sevei engq doxhuz

Daibyauj caez lwnh naeuz
Seiqhenz aeu hen maenh
Bobaq mauhloeg daenj
Gij haenx cij dwg gyaeu

Song hoih caez nyinhnaeuz
Gaijgwz caiq haeujaeg
Caezgya dawz rap naek
Fazcanj yaek ndaej nyaemz

Gij gwn aeu ancienz
Sien guh ndei yiemz guenj
Mingh vunz gim mbouj vuenh
Mbouj ndaej luenh gai uq

Cibbet daih cingsaenz
Gaenq haenx sim beksingq
Dangj vix raeuz bae bingq
Dingh saedyienh siengjmuengh



Veiz Gozcingh Sangcieng Cawj-guenj Guengjsae Ngeihcib Bi

韦国清上将主政广西二十年

□Hoz Saubangj sij Cinz Siengzcouh Liuz Gingliuj Cinz Siengzgen hoiz

Dahyungghyangh faen Namzningz baenz namz baek song gaiq, doenghbaez, ci caeuq vunz gvaq dah, ciuhciuh daihdaih cungj baengh ruz doz. Doeklaeng Dah Baihnamz Gunghyezyenz fazcanj caeuq vunz daengx si demlai, caiq gya hwnj Namzningz Si ci baebae dauqdauq yied daeuj yied lai, doxlienx gyaudoeng song haenz cix baenz aen vwndiz yienhda lo.

Veiz Gozcingh gig gvansim hwnjguh Giuzhung Yunghgyangh. Dwg de caeuq Cinz Yinggih caenndang yaengdingh giz dieghwnj. Seizhaenx Cinz Yinggih dwg boux suhgi faenguenj gunghyez Swcigih Dangjveij ndeu, youh dwg boux Swcigih Cwngfuj fucujsiz giem boux cujyin Goekdaej Gunghyez Gensez Veijyenzvei ndeu.

Sezgi Giuzhung Yunghgyangh, doiq gvangqdoh gwnzgiuz miz song cungj yigen mbouj doengz. Miz vunz

cawjcieng guh baenz 18 maex cix baenz lo. Gij vunzgisuz gunghcwngz Guekgya Gyauhdunghbu caemh naeuz, youq ndaw guek raeuz guh diuzgiuz goengloh coengzlaiz mbouj mauhgya 18 maex. Cinz Yinggih daengj vunz cawjcieng lai gvangq di, guh baenz 24 maex.

Veiz Gozcingh dingjrenz 24 maex. De naeuz, Giuzhung Yunghgyangh dwg diuzroen youqgaenj ndeu, guh giuz caemh aeu naemj

daengzcog fazcanj, aeu yawj ndaej gyae di. Gij gvangqdoh gwnzgiuz, gaej naeuz gaxgonq mbouj miz gvaq, seizneix cix mbouj ndaej miz. Gij gvangqdoh dwg ciuq gij aeu caeuq gij hajnaengz cix dingh okdaeuj, aengiuz neix youh dwg roenci, youh dwg roenvunzbyaij, songhenz aengiuz neix aeu louz 3 maex daeuj guh roenvunzbyaij, danghnaeuz guh baenz 18 maex nei, roenci cijmiz 12 maex, mbouj hab gij aeu daengzcog fazcanj

haenx. De doengzeiq ciuq 24 maex guh sezgi, roenci 18 maex, gwnzgiuz ndaej hai gvaq aendanjgwz naek 60 dun haenx, lajgiuz ndaej doeng gvaq aenruz naek cien dun haenx. Gyauhdunghbu doeklaeng caemh doengzeiq aen yigen neix. Giuzhung Yunghgyangh dwg seizhaenx daengx guek aengiuz goengloh ceiq gvangq ndeu.

(caengz sat)